

LI MÉROTE TOÛRNÉYE À COMÉRE.

D'APRÈS JEAN DE LA FONTAINE.

On-ome, qu'èsteut d'dja d'âdje,

Èt qui vikeut tot seû,

Nin trop malin, mins sâdje

Fieut tot po yèsse eûreûs.

I n'aveut ni famille

Ni soçons, ni vwèsins ;

Dès tchèts ? Gn-a tant qu'à mile ,

Ça costéye deûs côps rin !

Au mitan dèl nitéye,

One fumèle lî sorît ;

Totes sès soûs sont fayéyes,

Èt sès frères bardouchîs.

I r'tûze qui lès coméres

Què l'ont faît assoti

N' valint nin li p'tite mère

Qu'èst d'lé li po tadi.

C'èst qu'i 'nn'èst si bin lwagne

Qu'i lî vout d'ner on nom,

On vraî nom, nin on bwagne,

Èt surtout pont d' sornom.

« On l' lomerè “ Mârguèrite ! “ »

I l' vwèt télemint voltî

Qui, faît-à faît, i ride

Jusqu'à tot comachî.

I s'èdwat si bin fwârt,

T'aureus dit on sokia ;

À crwêre qu'il èsteut mwârt !

C'èst co byin pîre qui ça !

I sondje : “ Si Mârguèrite

Qu'èst capâbe dè l' gâter,

Divint l' feume qu'i mèrite :
Asteûre, i l' pout mârier.
I lî faît dès manouches
Po l' mia amôdurer. "
Lèye, po s' tinu aus couches,
Mûsenéye come po l' blader.
Il èst sûr di s'-t- afaire,
I vout aler pus lon :
« Dji n'aureu seû mia tchaîr ! »,
Preûve qu'i s'î crwèt po d' bon.
I lance sès-èsclamûres,
C'èst s' façon d' dîre : "Merci ! " ;
Mins l' feume nè l' vout pus chûre,
Èlle a oyu l' soris...
One bèle soris qui grète
Dins l'ârmwêre avaur là ;
I faut bin qu'èle l'arête ,
Si vraî mèstî, c'èst ça.
Èle tûze qu'èlle a dèl chance ,
L'ôte nè l'a nin r'mètu :
« Nos-avans faît con'chance
En s' crwèsant one sadju.»
One bin riv'nante comére,
Li soris 'nn'a nin peû.
Mins on tchèt, ça èst fiér,
Si song a r'pris li d'zeû !

One acheléye qui vout dîre
Qu'on-z-èst tortos ç' qu'on-z-èst !
On risquéye sovint pîre
Tot r'nîyant ç' qu'on d'vêrè.
Dès chichis, dès grimaces
Di sot ou d' rossia tchin,

C'èst catchî drî li scwace
Tot ç' qu'amwin.ne li pènin.
Si ça d'mande do coradje
Di s' mostrer tél qu'on-z-èst,
Ça spaugne byin dès daladjes
Qui n' sorvêrin.n' qu'après.

Albert Delvaux

Octôbe 2012.

On bwagne nom : un nom fantaisiste.

Manouche : marque d'affection.

Amôdurer : amadouer.

Mûsener : fredonner.

Blader : flatter.

One sadju : quelque part.

Acheléye : remue-ménage.

Daladje : tintamarre.

www.ecoledewallon